

陶雲汀先生奏疏

奏摺卷十二目錄

撫蘇稿

安化陶澍

請遞展應徵災緩銀米以紓民力摺子

總督會稿

會籌海運事宜摺子

江督河督會稿附片一件

勘估徒陽運河工段銀數摺子

附奏緝獲匪犯懲辦摺片

覆查沛縣成災五分請給口糧摺子

總督會稿

驗收運河挑工啟壩催漕摺子

蘇糧現由海運請將例帶蓆竹酌解銀兩交倉

摺子

江督漕督會稿

句容漕糧請照舊祔梗並納摺子

請緩攤徵華亭民修土塘原借

帑銀摺子

查明各屬捐賑紳商請分別獎勵摺子

總督會
稿

附奏請緩攤徵前借興辦黃浦水利

帑項摺片

御賜福字鹿謝

恩摺子

親赴上海督辦海運摺子

海運初兌米船陸續開出十激摺子 附片一件

沙船加裝米石摺子 附片二件

請遞展應徵災緩銀米以紓民力摺子

總督會稿

奏爲應徵道光三年災緩二三兩限銀米懇

恩俯准遞展年限分年帶納以紓民力事竊照江蘇
省道光三年被水成災田地應行蠲緩錢糧先
經前任督臣撫臣

奏明分別蠲緩並將通境成災五分以上各州縣
額徵白糧米石一體分年帶徵各在案所有本
年應徵二限銀米前經照例通飭啟徵完解去
後茲據蘇州布政使賀長齡詳稱據上海縣具
稟道光三年大災以後元氣未復各花戶完納

本年新賦及三年分初限銀米已形竭蹶若再兼輸三年二限銀米民力難紓懇請遞緩帶徵並據長洲等屬各以前情詳報到司當因帶徵銀米攸關起運要欸果否民力難輸必需遞展卽經通飭各府州體察實在情形酌議詳辦旋據蘇州松江常州鎮江四府併太倉州先後詳稱飭據長洲元和吳縣吳江震澤常熟昭文崑山新陽華亭奉賢婁縣金山上海南匯青浦川沙宜興荆溪丹徒金壇溧陽太倉鎮洋嘉定寶山等二十六州廳縣及蘇州太倉鎮海金山等

四衛查明道光三年均被重災民間元氣迄今未復新舊並納民力拮据委係實在情形請將道光五年秋後應行帶徵三年分災緩二限銀米及原緩二限白糧米石同丹徒縣原緩二限蘆課錢糧均請展緩一年從道光六年秋後啟徵其三年分災緩三限銀米亦請遞緩至道光七年秋後啟徵等情並據聲明其餘太湖廳暨武進陽湖無錫金匱江陰靖江丹陽崇明等八縣體察民情尙不致於拮据均請照常催徵無須遞緩各等情由司核明詳請具

奏前來臣等伏查各屬經徵地漕銀米原應依限催徵不容稍有蒂欠惟道光三年被災以後民間元氣未復今秋雖屬有收除應徵本年條漕外尚有帶徵積年舊欠若令兼輸三年二限銀米民力實有未逮合無仰懇

聖恩俯准將長洲元和吳縣吳江震澤常熟昭文崑山新陽華亭奉賢婁縣金山上海南匯青浦川沙宜興荆溪丹徒金壇溧陽太倉鎮洋嘉定寶山等二十六州廳縣并蘇州太倉鎮海金山等四衛本年秋後應徵道光三年災緩二限銀米

及原緩二限白糧米石同丹徒縣原緩二限蘆
課錢糧均緩至道光六年秋後啟徵其三限銀
米遞緩至七年秋後帶徵以紓民力除飭將各
該州縣廳衛實欠銀米細款確數專案造冊另
行咨部其初限未完及積欠銀米仍飭趕緊催
收分別解運外所有江蘇省應徵道光三年災
緩二三兩限銀米懇請遞緩緣由謹會同漕運
督臣陳中孚合詞恭摺具

奏伏乞

皇上聖鑒訓示謹

奏

道光五年十月三十日具

奏十二月初四日奉到

硃批另有旨欽此又同日奉到

道光五年十一月十九日內閣奉

上諭琦善等奏應徵災緩銀米懇請遞緩一摺江蘇
省除應徵本年條漕外尚有帶徵積年舊欠惟自
道光三年被災後民間元氣未復若令兼輸三年
二限銀米民力不免拮据著加恩將長洲元和吳
縣吳江震澤常熟昭文崑山新陽華亭奉賢婁縣

金山上海南匯青浦川沙宜興荆溪丹徒金壇溧
陽太倉鎮洋嘉定寶山等二十六州廳縣并蘇州
太倉鎮海金山等四衛本年秋後應徵道光三年
災緩二限銀米及原緩二限白糧米石同丹徒縣
原緩二限蘆課錢糧均著緩至道光六年秋後啟
徵其三限銀米遞緩至七年秋後帶徵以紓民力
其初限未完及積欠銀米仍著趕緊催收分別解
運該部知道欽此

會籌海運事宜摺子

江督漕督會稿
附片一件

奏爲會籌海運陸續應辦各事宜請

旨遵行事竊照本年海運漕糧業經臣等將應委驗
米交米道府各員並籌款協貼天津雇剝及通
倉經紀人等飯食各項

奏奉

諭旨飭行欽遵在案現屆新漕啟徵商船陸續歸次
一俟明年二三月間即可次第兌運開行所有
海運陸續應辦各事宜謹列條款恭呈

御覽

一驗米應責成糧道會同蘇松太道監兌也查
驗米爲漕運要務糧道有監兌專司應請卽
派蘇松督糧道宋潢暫駐上海會同蘇松太
道潘恭常逐細查驗兌交商船並封貯樣米
隨船帶赴天津由交米委員稟送

欽派大臣在於沙船比對米色按冊交收但商船趲
風開行先後不齊該糧道勢不能隨船前往
應請無庸押運赴津以免顧此失彼

一赴津交米應分別委員前往也查蘇省漕糧
旣多商船次第開行不便壓前等後該糧道

既須驗米不能押運自應先派大員賫帶冊籍前赴天津經理交兌事宜查有前經

奏派會議海運章程之原任河南河北道鄒錫淳
揀發道府慶玉李湘蒞堪以委赴天津辦理
交米事宜又查有泰州知州王有慶蘇州府
管糧通判清平堪以委赴天津幫辦交米事
宜以上各員俱令各帶佐雜一員先由陸路
赴津妥爲經理均俟漕糧全數到彼兌交剝
船方准回蘇銷差

一交米委員應以到天津爲竣事無須再至通

倉也查來年蘇屬漕糧由海運送事屬創行本不能與往歲軍船視同一例而經紀人等不能無弊必得從嚴約束使沙船無所畏累庶次運不致稽遲惟沙船僅能到津而止前此道光三年間商所運臺灣米石俱於天津交卸並未運送通倉此次業經臣等奏奉

諭旨屆期

欽派大臣在津驗收並由戶部議定章程奏請

勅下倉場侍郎督飭坐糧廳於經紀吏役內揀擇誠實之人派令辦剝奉

旨飭行在案是漕糧之純潔與否既經

欽派大臣在於天津水次驗明到通以後即可無庸
覆驗應請將過剝事宜責成通倉各監督帶
同各倉經紀人等一手經理押運赴通其江
省交米委員一俟天津兌給剝船卽已交卸
竣事無須再至通倉庶彼此均無推諉第剝
船自津赴通盤量不無折耗則耗米在所必
需兼查剝船向皆酌給飯米此次自亦未便
短少查有例應給丁耗米十八萬餘石業經
奏請撥給商船十二萬餘石尚有節省耗米六萬

餘石除此項搭運節省耗米內亦應劃給商船耗米外實存米五萬九千六百餘石隨正起運赴津所有天津剝船盤耗飯米等項應請卽於此項節省耗米內酌量撥給仰懇

勅下倉場侍郎會同直隸督臣妥議辦理

一協貼天津通倉銀兩現由蘇省籌款解交也通倉派往天津之經紀人等飯食雜費及盤量身工各款臣等已於前摺聲明除將旗丁到通應領銀米等款撥抵外由蘇另籌津貼茲擬按照起運米數每石給銀四分措解銀

六萬餘兩交倉場衙門分別發給又天津雇
剝不敷等項除應由直隸督臣

奏明動撥外尚有例不准銷各款甚多茲擬措解
銀六萬餘兩交天津道庫俾資協貼以上二
款現在委員先期解往其帶徵各米應俟確
核儘徵數目計歸海運若干再行籌款協貼
一押運宜遴委武職大員也查商船自蘇赴津
既有各省沿海水師會哨巡防足資護送前
經臣等

奏明派委武職大員二人押坐商船赴津以資稽

察彈壓茲查有川沙營叅將關天培堪以委
押頭運船隻京口協副將湯攀龍堪以委押
次運船隻惟洋面巡護旣已專責沿海水師
該二員祇須酌帶隨從數人不必多派弁兵
以節糜費

以上數條謹就臣等管見所及合詞具
奏伏乞

皇上訓示遵行謹

奏

道光五年十一月十七日具

奏

道光五年十二月二十一日奉到

硃批另有旨欽此同日奉到

道光五年十二月初五日內閣奉

上諭琦善等奏會籌海運應辦各事宜一摺江蘇現屆新漕啟徵商船陸續歸次來年二三月間即可次第兌運開行著責成蘇松督糧道會同蘇松太道查驗米色兌交商船並封貯樣米隨船帶赴天津由交米委員送交欽派大臣比對米色按冊交收其到津以後過剝事宜責成坐糧廳帶同經紀

人等一手經理押運赴通所有江省交米委員在
津將漕糧兌給剝船卽已交卸竣事無庸再至通
倉以免推諉惟剝船自津赴通盤量不無折耗有
例應給丁耗米十八萬餘石業經奏准撥給商船
十二萬餘石尚有節省耗米六萬餘石除此項搭
運節省耗米內應劃給商船外實存米五萬九千
六百餘石隨正起運赴津所有天津剝船盤耗飯
米等項該督等請於此項節省耗米內酌量撥給
著倉場侍郎會同直隸總督妥議辦理至直隸雇
剝不敷等款著該督等查照戶部議覆直隸總督

具奏銀數分別籌撥解赴直隸備用餘俱照所議
辦理該部知道欽此

再江省交米委員以到津爲竣事臣等已於正摺聲明其實在不能到通之故緣通倉經紀人等無論米色好醜槩不免需索苛求由來已久其弊斷難盡除而其人數又復不少向來起運漕糧皆由旗丁按米領運分幫照料赴通每船正副二丁以蘇屬新漕一百五十萬石而計旗丁不下數千人皆係歷年出運熟悉情形是以辦理較易而所費頗屬不資本年州縣津貼旗丁幫費一項前經臣琦善附片具奏撥作海運經費而各幫軍船又俱截留河北接

運盤壩漕糧該丁等應在本船照料勢難分身
押運卽酌爲抽派隨同沙船赴津而津貼之費
亦無所出現在江省所派交米委員僅止數人
其料理一切萬不能如衆旗丁之周密而直隸
官員雖照料較易若經紀一涉需索則畏累之
心亦與江省委員相似况己在

欽派大臣驗收米色之後亦無又任通倉經紀再驗
之理臣等公同商酌己將經紀人等飯食雜費
各款除將應領銀米撥抵外另籌津貼銀兩解
交倉場分別給發惟有節懇

皇上天恩俯准查照部議由倉場衙門督飭經紀吏役人等派令辦剝則漕米到津一經

欽派大臣驗明在江省交米委員已屬竣事應請免其前至通倉庶交兌事宜各有責成而海運經費亦無短絀臣等因津貼幫費一項事涉陋規未便於正摺聲明謹將江省交米委員實在不能到通緣由合詞附片具陳伏祈

聖鑒謹

奏

道光五年十一月十七日附

奏

道光五年十二月二十一日奉到

硃批另有旨欽此同日並准

軍機處知會 貴督等具奏交米委員片一件
奉

硃批另有旨欽此已寄

諭倉場侍郎遵辦矣

勘估徒陽運河工段銀數摺子

奏爲勘估徒陽運河挑撈工段銀數仰祈

聖鑒事竊照鎮江府屬丹徒丹陽二縣運河爲江浙
兩省漕船經由要道該處河身窄狹水無來源
全藉江潮灌注每日潮汐挾沙而行水去沙停
兼以兩岸積土鬆浮雨後坍卸易致淤淺向例
於每年回空過竣後擇淺挑撈屆六年大挑一
次本年輪屆大挑當經飭據該道府先後稟稱
蘇省回空船隻現留河北接運未經南下明春
試行海運漕船不由京口行走而浙省重運抵

境須在二月望間其時春潮旺漲足資浮送惟
徒陽二縣新漕運赴上海交兌正在冬臘潮枯
之際必得河道深通方可遄行無阻擬請展緩
大挑仍改小挑以節糜費定於十一月初五日
煞壩排車戽水並據常鎮道劉名載鎮江府知
府羅琦詳報督同丹徒丹陽兩縣逐段測量勘
得丹徒縣境內自江口起至丹徒橋上止河長
三千七百六十五丈又自櫻桃園上起至越河
閘上止河長九百五十丈逐段淺澁應請一律
開挑又江口壩外淤淺河面寬濶難以築壩興

挑同壩外間段淺澁之東壩等二十處共長一千六百九十丈俱應估撈又各段內南北兩岸俱有陽灘挺礙河心共長五百丈應加估切統計挑撈築壩切灘並修換各閘板繩索等項共估需銀一萬四千六百四十八兩四厘又丹陽縣境內河道寬平江潮流注稍緩積淤雖輕惟由閘上起至南薰閘止河長八百丈又自三義閣起至六里橋上止河長六百丈河身均屬淤墊應請煞壩開挑又定山灣等三十四處間段淺澁共長一千五百八十丈應行罾撈加以各

段內應切陽灘一百二十五丈共估計需銀四千七百九十八兩七錢八分合計兩縣各工通共估銀一萬九千四百四十六兩七錢八分四厘由蘇州藩司賀長齡詳請動支樂生洲租息銀五千八百一十二兩五錢三分一厘不敷銀一萬三千六百三十四兩二錢五分三厘請循例於司庫存公項下鹽規匣費平市及文職空缺等款銀內動支給辦等情前來臣因辦理海運正當喫緊之際不克分身前往飭令常鎮道覆加查勘將原估各段丈尺逐一標立誌椿加

封灰印以杜偷減草率之弊並責成該道府親
駐工所嚴督各工員認真挑撈迅速蒧事工竣
未啟壩以前臣仍卽親往驗收如查出挑撈寬
深丈尺與原估標誌不符卽當據實叅辦總期
一律深通不使稍有草率偷減除另取土方夫
工細冊分別

題咨外所有勘估工段銀數謹會同兩江總督臣
琦善合詞恭摺具

奏伏乞

皇上聖鑒謹

奏

道光五年十一月十七日具

奏十二月二十一日奉到

硃批另有旨欽此同日奉到

道光五年十二月初五日內閣奉

上諭陶澍奏估挑徒陽運河一摺江蘇丹徒丹陽二縣境內運河爲漕船經由要道本年輪屆六年大挑據該撫奏請展緩大挑仍改小挑以節糜費共估需銀一萬九千四百四十六兩零著照所請准其於蘇州藩庫動支樂生洲租息銀五千八百一

十二兩零其不敷銀一萬三千六百三十四兩零
著於司庫鹽規匣費平市及文職空缺等款銀內
動支給辦該撫卽督飭該道府等趕緊興挑迅速
蒧事工竣後該撫親往驗收如查有草率偷減情
弊卽行據實叅辦該部知道欽此

附奏緝獲匪犯懲辦摺片

再江蘇省徐邳淮海一帶與皖豫山東等處犬牙相錯爲梟匪出沒之所逃兇逃盜間亦潛匿隱伏此拏彼竄每難就獲

臣

抵任後與督

臣

琦

善面商嚴飭地方文武無分畛域設法堵拏旋據各營縣緝獲梟徒賀三虎等二百餘名因人數較多逐程解蘇有需往返當經督

臣

飭委運

司就近審辦此外又據海州獲犯尹廣修等泰州獲犯夏太等興化縣獲犯王繼茂等南匯縣獲犯李大觀等青浦縣獲犯張和等宿遷縣獲

犯何德等睢寧縣獲犯王學魁等贛榆縣獲犯
彭貴等共計一百餘名或係結夥販私或係開
巢護送均經會營拏獲起有刀鎗火器車船私
鹽等物並據江寧縣拏獲安徽當塗縣越獄重
犯唐二湯二二名泰興縣拏獲上元縣逃兇程
喜一名常熟縣拏獲崇明縣逃盜陳二顧大二
名先後協同稟報經臣批飭臬司嚴審究辦此
次各員弁破除畛域之見獲犯多名緝捕尙屬
認真現值嚴冬宵小尤易竊發仍飭各屬督同
兵役梭織巡查毋稍鬆勁以靖地方合將緝獲

各匪分起辦理緣由附片以

聞謹

奏

道光五年十二月初三日具

奏六年正月初四日奉到

硃批禁暴安良地方大吏之先務汝能留意朕甚嘉
焉嗣後倍當奮勉搜除窩主尤爲扼要勉之毋忽
欽此

覆查沛縣成災五分請給口糧摺子

總督會稿

奏爲遵

旨查明恭摺覆

奏仰祈

聖鑒事竊照道光五年十月初三日奉

上諭江蘇六合等州縣衛被旱被水來春應否接濟之處查明於封印前奏到等因欽此

臣等跪讀

恩綸仰見我

皇上軫念災黎有加無已之至意當卽恭錄轉行欽

遵謹查去後今據江寧布政使張志緒查明各

州縣衛情形詳請核

奏前來等因伏查本年江寧淮安揚州徐州等府屬各州縣衛被旱被水情形當經會摺奏奉

恩旨分別蠲緩錢糧已沐

皇仁均沾

闕澤茲復仰荷

聖慈垂詢等因細加體察江浦縣成災五分之坊一等十二里連年水旱頻仍本年又復被旱戶鮮蓋藏來春青黃不接之時民力不免拮据相應
恭懇

皇上天恩將沛縣成災五分之坊一等十二里乏食貧民

賞給一月口糧以資接濟感沐

仁慈益無涯涘其餘歉收之六合等二十州縣衛現在情形尚可毋須接濟統俟來春察看情形如有無力佃農應須酌借籽種口糧及出易平糶之處臨時再行酌辦所有查明沛縣成災五分之坊一等十二里來春應需接濟緣由謹合詞恭摺具

奏伏乞

皇上聖鑒謹

奏

道光五年十二月初三日具

奏六年正月初四日奉到

硃批候旨施行欽此

道光六年正月初四日奉

上諭上年江蘇省沛縣被災業經降旨蠲緩小民自可無虞困乏惟念今春青黃不接之時民力仍恐竭蹶著加恩將沛縣成災五分之坊一等十二里乏食貧民賞給一月口糧以資接濟用示朕惠鮮

懷保敷布春膏至意該部卽遵諭行欽此

驗收運河挑工啟壩催漕摺子

奏爲驗收徒陽運河挑工完竣併啟壩催漕各緣
由仰祈

聖鑒事竊照鎮江府屬丹徒丹陽二縣運河爲江浙
兩省漕道該處水無來源專賴江潮灌注挾沙
而行多有淤滯本年輪應大挑因蘇松等屬現
辦海運明春惟浙省船隻仍從京口渡江及徒
陽二縣新漕赴上海交兌均應由該處經行據
常鎮道劉名載鎮江府知府羅琦稟請展緩大
挑暫改小挑等因經臣飭估工段銀數並札常

鎮道勘覆具

奏勒限蒞事在案茲據該道府具報自十一月初五日以後兼旬晴暖各工員集夫挑挖完工稟請驗收臣隨即自蘇起程親赴鎮江自丹陽尾工起至江口大壩止逐段覆勘所挑丈尺悉與原估相符其餘撈淺各工亦皆如式惟丹陽縣境內應挑各工間有淺窄之處當經該道府督飭晝夜補挑一律完竣臣驗收既竣卽飭將子壩封墩次第起除以通船隻計望前潮起卽可日增暢旺查鎮江所屬漕米距上海最遠現派

首先赴兌需用剝船甚多轉瞬浙船南來彼此
迎頭若不將本境船隻豫爲疏通難免擁擠有
礙漕行臣已遴委鎮江府三之富康候補鹽大
使黃冕守催丹陽丹徒二縣船迅卽開行以
期魚貫直前務俾順速早達

天庾所有驗收運河挑工啟壩催船各緣由謹會
同兩江總督臣琦善合詞具

奏伏乞

皇上聖鑒謹

奏

道光五年十二月二十一日具

奏六年正月二十二日奉到

硃批知道了欽此

蘇糧現由海運請將例帶蓆竹酌解銀兩交倉

摺子

總督會稿

奏爲蘇糧現由海運請將例帶蓆竹酌解銀兩交倉以利漕行仰祈

聖鑒事竊照蘇松常鎮太五廣州起運漕糧應解蓆片毛竹二項例由糧道衙門動支銀兩發給幫丁購帶交倉現在試行海運已飭各州縣籌辦蓆片毛竹爲商船襯艙氣筒之用爲數甚多卽以抵補例帶蓆竹原屬有贏無絀但商船形式與糧艘不同現用蓆片俱係釘入船口之內其

毛竹亦已造成氣筒計高長一丈圍圓一尺四五寸不等誠恐到津後拆卸選抵交倉未能合用若將例解蓆竹另行購備再令商船帶往交倉不特多占船艙有礙裝米且艙短料長亦難安放若堆貯艙面又易招風實與揚帆使戢諸多窒礙惟通倉蓆竹亦在必需所有此項例支蓆竹銀兩未便歸於節省造報自應蘇省如數解銀赴倉場衙門就近酌量購置庶爲兩便可免貽誤除飭該道發銀趕解赴通外謹會同漕運總督臣陳中孚合詞恭摺具

奏請

旨勅下倉場侍郎查照辦理伏乞

皇上聖鑒訓示謹

奏

道光五年十二月二十一日具

奏六年正月二十二日奉到

硃批該衙門知道欽此

句容漕糧請照舊秬稷並納摺子

奏爲句容縣本年漕糧請照舊秬稷並納仰祈

聖鑒事竊照江蘇省漕糧係收稷米內有江寧府屬
之句容縣高山環抱土性赤埴山田十居其八
圩田僅十之二查圩田下濕宜種稷稻而秬稷
耐旱於山田尤宜是以該境民人向利種秬
查雍正十年卽曾咨准部覆秬稷並納載入漕
運全書迨後援例奏咨准令兼收由來已久上
年經前撫臣張師誠照案具

奏奉

硃批知道了嗣後若非出於不得已不准動輒以並
納奏請也欽此欽遵轉行遵照並經藩司發示遍
貼曉諭在案茲據江寧布政使張志緒江安督
糧道湯藩詳稱句容一縣本年初夏雨澤愆期
山田未能沾足農民惟恐被旱失收仍照舊多
種耐旱之秬稻其圩田多係坐落山根土俱赤
色卽所種稷稻性因土變收穫之時亦有紅秬
夾雜委係實在情形限於天時地勢竝無捏飾
計該縣十六鄉糧戶額徵起運漕米三萬三千
四百餘石之外尚有贈五行月恤孤等米爲數

較多勢難令其變賣土產之米另買粳米交倉
且鄰近同府之上元江寧江浦六合等縣俱係
以秈米完漕亦與秈米相類並無產粳之區若
赴蘇常等屬購買非特盤運需費市僧居奇小
民難堪苦累亦恐畏難觀望有誤漕運窒礙殊
多此萬不得已之下情詳請具

奏仍准秈粳並納以順輿情而免誤運等情並據
聲請嗣後於每年四五月間察看情形如係雨
水調勻山田無虞受旱督令一律種粳照例揀
選粳米完漕其或得雨稍遲農民防旱種秈總

卷之三
三十一
令該縣預期稟報由司道委員勘實詳請咨部
查照免致臨時再行瀆

奏等因前來臣查句容地方山多圩少不耐旱乾
是以該境農民向多種秬本年初夏得雨稍遲
仍舊種秬者多以致交倉之米顏色間有參差
惟米質本堅實與粳米無異既據該司道查明
委係限於時地情非得已惟有仰懇

聖恩俯准將句容縣道光五年漕糧仍舊兼收秬粳
以示體卹而速漕運並請嗣後每年四五月間
察看情形如係雨水調勻山田無虞受旱督令

一律種梗或因得雨稍遲農民防旱祇能種秧
卽由該縣立時稟報以便確查咨部存案毋許
臨時再請

奏咨庶小民渥荷

鴻慈旣無苦累之虞而於漕務益昭核實矣所有句
容縣仍請循照舊例抽梗並納緣由謹會同兩
江總督臣琦善漕運總督臣陳中孚合詞恭摺
具

奏伏乞

皇上聖鑒謹

奏

道光五年十二月二十一日具

奏六年正月二十二日奉到

硃批另有旨欽此同日奉到

道光六年正月初七日內閣奉

上諭陶澍奏句容縣本年漕糧請照舊抽梗並納一
摺江蘇省漕糧例收梗米據該撫查明江寧府屬
之句容一縣山多圩少上年夏間得雨稍遲該縣
農民種植耨耨多以致交倉之米顏色參差著照
所請准將句容縣道光五年漕糧仍舊抽梗並納

以示體卹嗣後著該撫飭屬於每年四五月間察看情形如係雨水調勻山田無虞受旱督令一律種稷或因得雨稍遲農民仍防旱種秬卽查明咨部存案毋許臨時籲請該部知道欽此

請緩攤徵華亭民修土塘原借

帑銀摺子

總督會稿

奏爲華亭縣民修土塘原借

帑銀請緩攤徵奏祈

聖鑒事據蘇州布政使賀長齡詳稱松江府屬之華亭縣道光三年風潮刷損城家墩等處土塘二千七百四十八丈八尺估計土方夫工銀四千一十五兩零此項土塘向例民修因工段較長民力難勝詳經前撫

臣

韓文綺會同前督

臣

孫

玉庭奏奉

諭旨准其於司庫存公銀內借給趕修於道光五年

按田攤徵解司歸款等因欽此當經轉飭欽遵去

後嗣因司庫存公銀兩不敷支發且值汛期難

以施工於道光五年四月據該縣赴司具領工

料銀兩散給興修完竣呈蒙驗收在案今據該

縣詳稱此項上塘清領銀兩原應本年攤徵還

款惟領銀興辦時已在本年上忙停徵之候且

縣境居民自道光三年被災之後至今元氣未

復兼有帶徵二三十年銀米若將上塘銀兩統

歸本年一併攤徵民力實有未逮詳請緩至道

光六年攤徵還款以紓民力等情由司查明詳請具

奏前來臣查華亭縣借修土塘工料銀兩原應於道光五年分攤徵還款惟本年甫經領銀興辦其時上忙錢糧業已停徵且該縣已有帶徵錢糧若將此項歸於本年一併帶徵民力實有未逮合無仰懇

皇上天恩將華亭縣借修土塘銀四千一十五兩零俯准緩至道光六年攤徵歸款以紓民力臣等謹合詞恭摺具

奏伏乞

皇上聖鑒訓示謹

奏

道光五年十二月二十一日具

奏六年正月二十二日奉到

硃批另有旨欽此又同日奉到

道光六年正月初七日內閣奉

上諭琦善等奏華亭縣民修土塘原借帑銀請緩攤
徵一摺江蘇華亭縣民修土塘工料銀兩前於司
庫存公銀內借給興修茲據該督等稱此項銀兩

應於道光五年攤徵還款惟上年甫經領銀興辦其時上忙錢糧業已停徵且該縣尚有帶徵道光二三年銀米若將此項一併帶徵民力實有未逮著照所請所有華亭縣借修土塘銀四千一十五兩零准其緩至道光六年攤徵歸款以紓民力該部知道欽此

查明各屬捐賑紳商殷戶請分別獎勵摺子

總督

會稿

奏爲查明道光三年江蘇省被水成災各屬紳商
殷戶捐資佐賑分別等差懇

恩獎勵仰祈

聖鑒事竊照道光三年江蘇各屬因夏秋被水成災

經前任督

臣

孫玉庭撫

臣

韓文綺會摺奏蒙

恩旨撫卹並於冬春

賞給口糧災黎人人得所共慶更生復據各屬紳商

殷戶捐資助賑或散給錢米或分設粥廠仰答

皇仁倍形踴躍當經前督撫臣將辦賑勞績最著人

員奏請

獎叙聲明捐賑紳士人數眾多應分別捐數等差查
取姓名履歷由司彙造清冊另行分別奏咨議
叙奉

上諭董辦義賑樂輸各紳民著照例分別捐數造冊
咨部核辦等因欽此欽遵在案臣等到任後查得
此案因捐戶較多造冊多有舛錯輾轉駁正爲
日已久未便再延致令好義紳民無所示勸當
經迭札催辦茲據江寧蘇州兩藩司各將所屬

捐輸姓名銀數分別冊報前來查江寧藩司所屬江寧揚州通州海門四府州廳屬捐輸銀錢米糧合共銀一十六萬三百一十一兩零內除請免議叙及三百兩以下應由本省酌給匾額獎賞外其捐至三百兩以上及千兩以上者共銀五萬七千四十五兩零蘇州藩司所屬蘇州松江常州鎮江太倉五府州屬捐輸銀錢米穀合共銀一百七十九萬六千一百八十二兩零內除請免議叙及三百兩以下應由本省酌給匾額獎賞外其捐至三百兩以上及數千兩一

萬餘兩者共銀七十七萬五百八十一兩零合
計兩藩司所屬各州縣紳士殷戶捐輸應行請
獎者共銀八十二萬七千六百二十六兩零查
嘉慶十九年成案凡捐銀在三百兩以上者造
冊咨部議叙今道光三年各屬被水成災情形
極重災區甚廣各屬紳民有身居職官首先董
倡亦有誼敦桑梓踴躍捐輸並非素封有力之
家樽節餘貲共成善舉合計同時寧蘇兩屬共
捐銀至一百九十五萬餘兩之多而內中捐銀
至三百兩以上及數千兩萬餘兩者計八十二

萬有餘其慷慨好義任恤鄉鄰體

聖主痼瘼之念登斯民登席之安實堪嘉尚相應仰懇

天恩勅部查照嘉慶十九年成案分別銀數酌加議叙並照例給予部照其中勸捐實在出力之董事似與僅捐賑銀者尤徵勸善之苦心又嘉定寶山二縣捐賑至四月之久悉由民辦奏免請帑較之別邑捐輸者尤爲好義可風並請

聖恩勅部從優獎叙俾資激勸又震澤縣捐戶王趙氏捐數在千兩以外應請給銀建坊此外現任

三
候補知府以下等員捐貲助賑亦屬急公好義
但係官員職所應爲應由臣等分別記功毋庸
請叙除將各冊送部聽候核議具

題請

旨遵行併咨明戶部外謹將道光三年分紳士捐賑
懇請

獎勵緣由合詞恭摺具

奏伏乞

皇上聖鑒

訓示再捐輸佐賑俱係各紳士公舉誠實之人董理

其事書役無從滋弊應請毋庸查造戶口冊及支用銀數款目送部以免紛擾又所捐銀兩除動用外間有餘存留爲各該地方義舉公用應聽民便毋庸報銷合併陳明謹

奏

道光五年十二月二十一日具

奏六年正月二十二日奉到

硃批另有旨欽此又同日奉到

道光六年正月初七日內閣奉

上諭琦善等奏查明各屬紳商殷戶捐貲佐賑請分

別獎勵一摺道光三年江蘇省被水成災各屬紳商殷戶捐貲助賑或散給錢米或分設粥廠實堪嘉尚茲據該督等查明江寧蘇州兩藩司所屬共捐銀一百九十五萬餘兩除捐數在三百兩以下應由本省酌給匾額獎賞外將捐至三百兩以上及數千兩一萬餘兩者造冊咨部著該部查照嘉慶十九年捐賑成案分別銀數給予議叙頒發執照其勸捐實在出力之董事並捐賑最久奏免請帑之嘉定寶山二縣各紳士尤爲好義可嘉著從優給予議叙俾資獎勵震澤縣捐戶王趙氏著照

所請准其給銀建坊此項捐賑銀兩係由該紳士
董理其事著毋庸查造戶口並支用銀數清冊報
部覈銷該部知道欽此

附奏請緩攤徵前借興辦黃浦水利

帑項摺片

總督會稿

再江蘇省興辦太湖下注黃浦一路水利工程
勘估工價銀七萬七千二百餘兩借動

帑項於本年五月間興挑完竣經前督

臣

魏元煜

撫

臣

張師誠驗收

奏報聲明借動工價應否俟吳淞等處續辦各工
全竣再行攤徵歸款飭俟司道議詳再行辦理
等情在案茲據司道具詳前來

臣

等查蘇省當

道光三年水災之後民間元氣未舒緩帶錢糧

現須分別啟徵如將此案水利工需於此時卽行攤徵民力實有未逮查吳淞江水道將來籌有經費自應一律興挑所有現辦黃浦工程借帑銀七萬七千二百餘兩合無仰懇

皇上天恩俯准暫予寬限俟將來吳淞江全工完竣再行一併攤徵歸款庶民力得以展紓而庫項亦不致懸宕理合附摺具陳伏乞

皇上聖鑒謹

奏

道光五年十二月二十一日附

奏六年正月二十二日奉到

硃批另有旨欽此同日奉到

道光六年正月初七日內閣奉

上諭琦善等奏前借興辦水利銀兩暫緩攤徵等語
上年江蘇省興辦黃浦一路水利工程借用銀兩
應行攤徵歸款茲據該督等查明該省自被災之
後民間元氣未紓緩帶錢糧現須分別啟徵若將
此項水利工需卽行攤徵民力實有未逮著照所
請准其將現辦黃浦工程所借銀七萬七千二百
餘兩暫予寬限俟吳淞江全工完竣再行一併攤

徵歸款以紓民力該部知道欽此

御賜福字麀鹿謝

恩摺子

奏爲恭謝

天恩仰祈

聖鑒事道光五年十二月二十一日摺并回蘇資奉
御書福字及麀鹿等肉

頒賞到臣謹卽恭設香案望

闕叩頭祇領欽惟我

皇上調泰延洪

履和錫羨福者富也標百順以

頒春祿以綏之軼八珍而

詔食

茂祉協鴻來之應

禹範徵庥

崇祺昭厲至之祥

堯厨編

德黃臣

福衢就覲久睹

奎文

仁園同登欣承

渥賜記

均禔於頻歲三錫

恩多表

吉祝於迎年百道

祐懋際此熙臺肇慶儼偕衆志以享牢還應夾轂行

春共飫

皇仁而布凱所有臣感抃下忱謹繕摺恭謝

天恩伏乞

皇上聖鑒謹

奏

道光六年正月二十四日具

奏二月二十三日在崑山途次奉到

硃批知道了欽此

親赴上海督辦海運摺子

奏爲海運緊要親赴上海一帶督辦仰祈

聖鑒事竊照本年江蘇漕米由海分運應辦事宜節

經臣會同督臣漕臣議

奏在案

臣

因海運事關初始經理匪易前經札商

督

臣

琦善俟開篆後

臣

卽親往上海一帶查辦

臣

於去臆徒陽運河挑竣卽委員分提各屬新

漕僱赴海口交兌適值冬令水涸兼以冰凌東

結剝船未能迅速復經遴委

臣

標中軍叅將張

殿華隨標學習三等子陳述祖候補鹽大使黃

晁迎提各屬漕舨星夜趕運連日雨雪應期運
河水長剝船暢行雲集上海臣已派委各員隨
同該道府等將現到海船九百數十號逐細扞
量每船約裝米若干自上海至黃浦一帶分段
駐泊將某船若干隻應兌某州縣漕糧編寫旗
幟以便一望卽知源源斛兌勿令擁擠計晴天
每日斛手百餘名可量兌米四萬餘石米質均
以乾潔爲主其白糧一項遵照倉場原奏及部
議較量足斛用口袋裝載以昭慎重現在鎮江
之米全經赴兌蘇常二府米船亦已半抵上海

其松江太倉之米尤切近易到米船既多各項人役甚衆一切稽查彈壓攸關緊要臣卽日由水路前往督同該道府委員等相機籌辦務俾妥速一俟兌有成數卽可將分起開行各事宜次第馳

奏仰答

宸厯所有臣衙門日行事件照例委藩司賀長齡代拆代行併將已經招解到省案件暫行代審以免遲延謹會同兩江總督臣琦善漕運總督臣陳中孚恭摺具

奏伏乞

皇上聖鑒謹

·奏

道光六年正月二十四日具

奏二月二十三日在崑山途次奉到

硃批知道了欽此

海運初兌米船陸續開出十次摺子附片一件

奏爲恭報

微臣

親至上海督辦海運現已兌有成

數陸續出口仰祈

聖鑒事竊照蘇松等屬試行海運前經札商督臣俟

開纂後

臣

卽親赴上海督辦業於正月二十四

日專摺具

奏在案

臣

因各屬漕剝雲集上海米多船衆各項

人役不下數十萬亟須妥爲布置卽由水路晝

夜兼行遞抵該處連日督同糧道宋潢上海道

潘恭常蘇州府額騰伊松江府陳鑾川沙同知

李景嶧上海縣許乃大及各委員等按照章程
分派經理其有量須變通者隨時籌酌期於慎
速並據提臣王應鳳於會哨巡洋後同駐上海
彈壓伏查上海縣黃浦碼頭自東迤北接連吳
淞閘門迤南一帶卽黃浦江俱係剝船經行之
路前因吳淞江冬底水涸多有淺阻改由吳江
縣之平望地方遶嘉善金山等處出黃浦江僭
行水道稍迂節經添委員弁同州縣原委各員
催僭迎提無分雨夜陸續剝到黃浦凡沙船歸
次派定某處米數卽懸掛各色旗號排列成行

剥船一到各認號旗就幫斛兌先於對岸之百
蓮涇派員查驗米色給單開斛每日輪派丞倅
委員督率各縣丁屬斗級笆夫斛手等分頭受
兌其沙船苫蓋俱由各縣自備竹木蓆片鐵釘
氣筒等物先行墊艙每裝米一艙上蓋稻草一
層以收潮氣並飭每縣帶解制斛十面經用道
府印烙到上海時仍由道府各員將領頒鐵斛
眼同船戶較準卽令該船戶畫押再加監兌委
員印封爲據每船另裝樣米一桶蓋貼印花帶
赴天津照驗兌竣一船卽將司道會印三聯執

照截給一張所有船戶膏柁姓名以及縣分米數詳細註明以憑稽核至領給水腳之後卽令船戶給州縣米結一紙委員亦給兌單一紙存照沙船雖經驗派在先而臨時受兌或有船身槽舊修艙未固者仍准挑換旬餘以來風日晴和剝船到浦隨驗隨兌添雇斛手至百餘名每日可兌米四五萬石現據呈報正月三十日截數共兌米五十四萬有零計算海運全漕已逾三分之一惟黃浦碼頭堪以停泊受兌之處無多沙船裝載後卽須隨兌隨開移至上海縣東

近海之吳淞口聽候在汛員弁掛驗放出崇明縣十浚地方寄碇守過二月初八日風信即可放洋長行其餘兌完船隻以次解纜茲據委員等呈報前來臣謹擇於二月初一日親赴寶山縣海口地方虔祀

海神先將兌足米船五百一十餘隻陸續放至十浚地方俟初八日風信一過即可開出大洋向北行駛一面催提各縣接運剝船到浦俾各委員趕緊斛兌所有現在辦理海運情形臣因關係

天庾重務謹會同督臣琦善漕臣陳中孚合詞具摺
由驛馳

奏仰慰

宸厯伏祈

皇上聖鑒訓示謹

奏

道光六年二月初三日上海由驛具

奏二月二十一日奉到

硃批覽奏俱悉欽此

再查前奉

諭旨海船到津爲日甚速著兩江總督於初次兌竣
將次開行時由四百里馳奏到日卽請欽派大員
前往天津查辦等因茲臣正在拜摺間接到督臣
琦善來信言現須前赴清江道路遠隔糧船旣
在十潑候風出洋恐委員等轉報有稽卽由臣
處將開行日期馳

奏臣查沙船經由大海各自駛行本無幫次現因
黃浦碼頭擁擠於正月二十三、四等日臣未到
上海之先業已有船十數隻陸續開出十潑據

稱該處一出大洋卽無島嶼可泊總須候過二月初八日風信方能開放但十潑距上海二百數十里一遇順風開行旬餘卽可抵津若俟稟報始行具

奏恐船到在先轉致措辦難及應卽請

旨簡派大臣會同倉場赴津驗收所有初運米數現在儘船儘兌隨兌隨開若風日晴和剝船順速計二月底初運可竣合併附陳謹

奏

道光六年二月初三日由驛附

奏二月二十一日奉到

硃批另有旨欽此同日奉到道光六年二月十一日

內閣奉

上諭陶澍奏海運沙船已陸續受兌開出十潑地方
候過二月初八日風信即可開行等語著派穆彰
阿於海船進口後前赴天津會同倉場侍郎驗收
如須隨帶司員卽自行酌派隨往欽此

沙船加裝米石摺子

附片二件
總督會稿

奏爲海運沙船加裝米石趕造另冊補咨以歸簡捷仰祈

聖鑒事伏查本年海運雇船原定八成裝米二成搭貨免其納稅以恤商情惟現當漕糧起運船多貨少未卽一律有貨可攬而米數百五十萬勻出一艙卽多得一艙之用海洋風信靡常難期迴檣迅速自應於初運船隻儘數裝載不必拘定八成裝米之議以歸簡捷

臣琦善與臣陶澍

札商意見相符當飭藩司賀長齡遴委蘇州府

知府額騰伊會同該道府丞縣等確切查覆因
思漕糧經由大海全在該船戶等各知保重不
得稍涉勉強臣陶澍到上海時卽日出示曉諭
各船有情願加裝者許其自行酌量數目具報
加裝仍照原議每石給運腳銀四錢耗米八升
其已裝客貨二成與不願加米者聽茲據該委
員等稟稱商船受兌以來見諸事體恤毫無擾
累倍覺歡忻鼓舞感奮急公有已經受兌八成
而未攬客貨者情願加裝米石臣核查無異卽
令該員等先將上海南匯等縣二運漕米分派

各船灑帶次儘松屬近處州縣糧米添派現已
加至三萬餘石尚有已扞未裝之船陸續加裝
惟從前所造咨冊祇據原派米數載入屆茲糧
運開行原冊篇頁繁多未便因加裝數目換造
致令稽遲臣等前因海運事屬剗行恐有拘泥
窒礙曾經

奏明由臣等隨時通融酌辦期於周妥所有現在
各船米數業於兌竣時發給三聯印照粘單加
注添裝某照米數蓋用糧道印信以便抵津之
日先憑執照米數兌收一面由上海公所補造

加米另冊註明船戶某人原裝某縣正耗米石若干加裝某縣正耗米石若干仍另造簡明清冊照依現今各船裝米執照數目飛咨倉場及天津收米之

欽派大臣以後隨兌隨報按五日一咨不必拘定初運次運之期如此辦理既歸簡核而南兌北交均免遲延歧誤至糧道衙門造辦各州縣漕白二米起運正耗數目仍照舊分別題咨以備稽核臣等爲漕米數多儘先裝載以期運務商情兩有裨益除將現在辦理加裝情形移咨直隸

倉場各衙門一體查照外謹會同漕運總督臣

陳中孚合詞附驛具

奏伏乞

皇上聖鑒訓示施行謹

奏

道光六年二月初三日上海由驛具

奏二月二十一日奉到

硃批依議轉行欽此

再上年十一月內直隸省議奏籌撥海運經費
各事宜內有沙船收入天津海口至東關上閘
地方係屬逆流應雇備緯夫拉挽前進共需錢
七千六百餘千原咨由蘇省發給嗣經戶部議
照直隸所奏改爲勛支卹費隨後找解補款查
此項緯夫價值現在蘇省未經發給難以稽遲
該商船一到天津卽須直隸省先行墊發雇夫
拉挽免致商船守候得以迅速回裝二運除再
行移咨直隸總督查照辦理外合併附片陳明
謹

奏

道光六年二月初三日由驛附

奏二月二十一日奉到

奉批知道了欽此

再海運以船隻爲主儘僱儘兌原不拘定兩運
之期惟因從前屢封屢放商情未免畏累臣於
上年七月到蘇後卽親赴上海傳集各沙船曉
以大義嚴禁擾累卽日具呈承攬者九百餘船
嗣於八月內藩司賀長齡赴上海會議章程復
添雇浙船百餘隻經此兩次攬雇海運大局遂
定此內如崇明縣舉人施彥士寶山縣監生陸
昌言首先領雇倡募招來最爲出力鄞縣職員
謝占壬上海縣監生王揆熟悉洋情効勞尤著
並有上海縣職員毛振勲朱增慎以自置沙船

領載該縣糧石萬餘石不受水脚價值情殷報
効其餘船商蔣炳陳廷芳陳鶴陳荷季兆縉季
存霖等亦俱招致多船爭先受雇至浙省蛋船
三不像船節准浙江巡撫程含章轉飭藩司繼
昌催雇來滬此項船戶非蘇省土著未有承攬
經手查署蘇松鎮河標副將裴安邦精勤幹練
且係浙籍諳音易通已飭令督同扞派浙船米
數一體裝載通計現到船隻大小千號儘船受
兌初運可在百萬石以外該商等感戴

皇恩咸知奮往除俟事竣遵照

奏定章程會同臣琦善臣陳中孚彙請
獎叙外合將商船踴躍情形附片以
聞謹

奏

道光六年二月初三日由驛附

奏二月二十一日奉到

硃批知道了欽此